

增修廣平縣志

叁

廣平縣志卷七

樂亭韓作舟湘亭編輯

十建置志

建置之有無興廢關係時代之隆替盛衰而一般創造精神暨其藝術思想又足以逾時而表現是以天方蠟頂易世猶存司土攷工周官不廢奈本縣地小民貧心餘力絀加以連年兵燹災害頻仍原有則蕩然無存規復更難於措款甚至城垣自毀開萬古之奇聞府館歸民貽一時之大耻雖經擇要修葺畢舉實愧無能欲謀遂漸更新特書以待來者記建置

城池

縣城

縣城周三里六十八步高二丈廣一丈門三東曰啓陽西曰美利南曰保障北

無門有樓曰兆元池深一丈五尺闊三丈

舊府志參舊志

城在金元時遷徙無常規制未備明洪武二年始治今地天順中創建土城成化三年知縣何琮增築城門建樓鑿池嘉靖間知縣寇陽萬歷間知縣陳繼王一龍各有增修崇禎十二年知縣張宏治改建甃城清順治間增築護城隄康熙四十

二年漳水溢城盡圯移治於城西北建修新堡即今之新城堡五十年復移舊治仍築土

城畿輔通志

同治三年知縣楊汝爲因舊基修築舊府志參縣志

光緒十九年癸巳知縣秦煥堯補修見新澤普楊纂基碑

民國九年華洋義賑會以工代賑補修任碑十二年十月縣知事任傳藻重修易東

門曰迎紫南門曰來薰西門曰挹秋見修城碑記

民國二十五年夏縣令張漢全重修東門曰長春南門曰時薰西門仍舊曰美利

見修城碑記

城及城樓因事變於二十七年冬盡行拆毀二十八年四月縣知事韓作舟由省款補助費項下請撥大洋二千一百元作爲監工飯費督率縣民重築新城計高一丈五尺廣一丈二尺池深一丈寬如故周七百丈有奇三門及四角並北城敵樓一律增新一月工竣三門仍沿舊名計費人工二十六萬共需款一萬八千餘元皆民力也記事乏石特志其始末於此

明蔣英記略云

山東膠州何公琮來知邑事持身廉謹聽政明決勞來安定而渙者以合撫摩休息而困者以蘇營作之始繚以周垣次及門池始於成化丙戌之仲冬功畢明年丁亥之季春傾覆者於焉而完固狹隘者於焉而寬廣其東西南皆有券與樓也今則發券構樓煥然一新大勢嚴正足以聳飭觀瞻堡池伉峭足以望銷汚穢殫惻摠忠不辜委任又有二尹于公聰以協恭之民樂趨其事而無怨恫之聲孰不誦其處置時宜而成功之速也特記之張其盛

侯廷訓保障樓記略云

御史傅公按廣平登城東樓見樓崩楹摧半就傾圯顧寇子而言曰是豈重坎設險以戒不虞之義哉曷極圖之寇子唯而退經之營之庶民攻之五閱月而後告成樓高凡三丈有奇重檐複楹屹立於寅賓之陽四角亦樓各一區列峙壯麗自得威遠之勢既乃走書告於余請記且議匾曰保障以無忘公教遂書而刻之石李養正記略云

邑城自江夏陳侯再行完治距茲已廿年矣丁未淫雨爲祟漳水泛漲波濤洶湧趨城市如壑敗垣之下皆成江河維時河北王侯諱一龍者率父老子弟冒雨出郭數里塞其決隄周環補築邑民幸免其魚而侵灌日久城遂因之潰裂越明年春侯請於當事重加修治檄允所請侯即考卜經營宵日揆劃簡吏人鳩匠作授以成計且嚴之董率閱三月而工報竣約城圍三里許堅厚牢密敵樓五角樓三舖舍十有五新甃城營房凡六文昌閣舊在北城侯意在興賢移於城之巽隅以起文峯是役也餽甃取諸里之素封每戶不過數百版築取諸里之窶夫每月不過二日一切灰木物料取諸犯科者之贖鍰悉與市相值若故民勞而不怨事易而功舉侯之謀遠爲利溥哉因識之以示永久

按原碑文字甚長舊志將前後盡行省略

邑侯任傳藻記略云

易曰王公設險以守其國語曰維垣孔固是則城垣之重要自古已然不僅今茲而已夷考廣邑城垣創製於明天順時嗣成化間邑令何公琮相繼葺治萬歷時陳公鑿又復遵令修葺一次四城煥然一新樓上揭以匾名崇禎十三年何公宏

治賡續修建浚池甃牆巍然屹絕頗具觀瞻嗣自有清迄至今日歷二百餘年幾經修葺以邑乘失修無可考據壬戌夏余來牧是邦時值冀南各屬盜匪充斥而邑境介隣魯豫尤爲盜匪出沒之區擄人勒贖事不一而足余於治匪之餘巡視邑城墻垣傾圯形同坦途可以過車馬焉北城一面民國九年雖經華洋義賑會籌款修築以工代賑顧因工料不堅未歷一年又多塌挫以此殘破之城垣敵彼源忽無常之悍匪吾民危險情狀何堪設想修築之謀烏容稍緩遂與楊紳瑞麟等商議就城內商民分途募貲仍照原式用土加工堅築興工於夏歷十月未兩月而工竣三城樓一律修築東城顏曰迎紫南城曰來薰西城曰挹秋是役也計時不及四月費貲未及三千貫集貲之勞楊紳居最三街村正耿克濟趙其昌單存義次之董役之勞本署科員陳君永德余君俊爲多楊紳耿紳次之督催并籌劃之勞則惟本署孔科長憲年是賴工竣翌年又經籌款城壕遍植樹株旣壯觀瞻將來之產仍指作城垣歲修之用如此經營煞費心力雖不云百雉壯觀然實墉實壑其完繕之工竊有附於屹屹巖城之義也於茲下邑不能不有以紀之庶

幾後來者亦可知余輩之苦心也

邑令張漢全記略云

古者設險守土乃建邦之大計其修城郭繕垣墉興師動衆具不得已之苦衷非徒壯一時之觀瞻已也廣平舊有土城創始於有明中葉其後數十年一修詳載民國壬戌任公修城記茲姑不論今又十四年矣繼任者雖累事增修數經淫雨坍塌日甚比年以來盜匪充斥居民一夕數驚每有岌岌不可終日之勢丙子夏月漢全承乏來守是邦覩甚圯毀恐啓姦宄覬覦之漸爰謀重修之舉適主席宋公以防匪竄擾檄修礮堡乃招集鄉耆喻以利害剴切指陳舉爲武動於是量丈數揣高卑度厚薄仞溝洫物土方議遠邇重期事計徒庸慮財用書餼糧以定役民情鼓舞子來趨事甫匝月前之傾墉坏堞今則巖巖屹屹如崇阿矣前之溝池淤塞今則增深益廣如天塹矣且睥睨斜削可以窺遠則射力弘也雉櫓環列圍牆一周則側防便也前之不可恃以爲險者今則屹然爲河北之保障則斯役之興其所關不綦重哉然有險而不能守尤兵家之大忌也故傳曰無戍而城讐必

緣焉是則整頓警團增加實力以與斯民共保斯城者其事又烏可緩乎董事者秘書孔憲蘊科長趙華南劉夢符承審韓祚昌巡官傅幹卿特務長曹鳳翔邑紳王壽昌耿克剛趙文明趙永昭許萬昌王錦堂張不顯王平章張金堂陳昶韓允執韓玉森郭維新李溶夫秦宜民張若栻柳繼曾王蓋臣馮殿玢璩長修陰自新馮步鶴例得書名因勒石以爲之記

公署

縣署

縣署在城內西北隅大堂兩翼左庫樓右贊政廳後改爲庫房前東西吏曹架

閣庫中爲戒石亭亭前儀門門之東爲賓賓館南爲申明旌善亭西爲圄圉所前

爲大門上建譙樓又前照壁大堂北爲後堂再北爲內宅明洪武二年建正德間

知縣顧璘

職官表列入宏治年

孫翱嘉靖間知縣李良翰申溪降慶間知縣張鵬翰萬歷間

知縣陳鑒相繼增修清康熙五十年知縣華士捷因水圯重修同治元年四月燬

於兵燹光緒初年知縣何庚生重修大堂吏曹旋因款絀中止迄未續修暫租舊

當舖爲公署

舊府志參識輔通志

民國二十七年冬事變被毀僅遺四壁二十八年二月縣

知事韓作舟重修

圖見卷首

明申溪記略云 丙辰夏予承乏茲邑既至見官舍庳陋不可棲息嗟異前人相沿至此可以爲難矣陰有拂衣之志父老覘予衷之不懌也約乘予公出爲撤其甚者葺之予素重興作且慮功未及民而先叢衆怨力止之不可僉曰往賢如某公不需治成而速遷又才如某公亦灰厥初心而遄去要皆身之弗安計之中變也我民望公之來久矣竊不虞公之亟去乎今日之舉將以留公也予喟然曰有是哉君子固不求全在念亦未有拂鬱其身而能展布其志者夫遠嫌者固陋畏難者積廢獨弗計長吏數遷送迎煩勞蚤緣漁獵之弊乎子來之義二三子良亦勤矣閱月正寢翼室告完乃迎母就養明年丁巳中堂書室亦成其諸欲圮者以次及之規制不殊而氣勢改觀矣歲積事舉民諒予之心予亦信民之志壇宇學宮亦漸鼎革則無捐剝力無妨病掌餼者不尅稽程者克敏雖經營於一時而使嗣來者適其心不移其志展才猷以錫民康孰與襲故守常戚戚朝夕以求速去者之爲利哉是知興作亦政之不可廢也因記之壁云

韓作舟記略云 本縣當金天會設治之初署址遷移靡定至明洪武二年始建新廨於城內乾方規模尙稱完備迭經歷任增修載在舊志清康熙四十二年與城同圯於水移治新堡閱八年遷回經華士捷大令並加修築無異向時同治元年四月又復燬於兵燹於是郅治臨民之地時興僦居傳舍之嗟光緒三年適何令庚生志存興作欲謀久遠不惜一勞奈預圖不臧初衷未遂大堂甫經工竣吏曹旋告囊空事遂廢止爰賃民房一半備價自購一半大加整飭亦甚堂皇即今縣署之舊址是也甲子一周迄未移易迨民國戊寅冬季因南北發生事變連同城垣盡被拆毀次年己卯一月余奉命牧斯土下車入視四壁空存既無隙地以棲身將何臨民而聽政當即冀除瓦礫鳩集人工與城垣同時修築物料惟求厥堅堂舍不在觀美三月以來計完成大堂五間堂前大門二門各一座堂前後東西科房十六間後樓五間東院辦公廳五間客廳三間庶務儲藏室一所飯廳廚室共五間後門跨門羣牆炮臺無不撤舊更新施丹塗堊計共費四千一百餘元統由本署經常節餘項下呈明上憲核准支銷未向民間徵一夫而派一款工事

報竣特濡筆以記其始末如此

典史廨 在縣治迤西同治元年燬於兵燹迄今未修

舊府志

廣平汛署 在城內

舊府志參營冊

久廢

陰陽學醫學 在縣治東南久廢

舊府志

僧會司 在千佛寺

舊府志

現改爲縣立女子小校

養濟院 在縣治西南康熙十四年署知縣錢天佑重修額養孤貧七十九名

畿輔通志屋

字圯今

舊府志

按縣舊志舊養濟院基址甚狹屋宇圯頽嘉靖十年侍御傅公按行畿內移檄修理知縣寇陽迺購民地以拓其基東西廣七丈南北袤十有二丈爲門兩楹額曰養濟院中曰存恤堂環繞而居者三十三楹各一戶一牖嘉靖辛卯工竣勒石以記十五年知縣劉教重加修葺萬歷四年知縣宋昂續修十八年變生回祿十毀三四知縣陳鑾捐俸修復孤貧男婦增至六十餘名嗣後食大糧者五十九名又有食小糧者二十名

察院行署 一在縣治東南

舊志作縣志東

一在縣治前明萬歷間知縣陳鑾王一龍相繼重

修今俱廢

府館

在縣治東萬歷間知縣陳鑾重修今廢

按舊府志萬歷十七年重修

鄉約亭

在縣東門外明宏治間建萬歷間知縣王一龍重修改作留行館

都祁記略云

明興定鼎之初躬彙明倫爲善等書以砥礪世風慮深理邃愚夫

愚婦艱於省悟復制聖諭頒布天下令所在有司俾木鐸聲諸閭閻以爲興善作德之具我兵憲見吾陳公奉聖諭詳爲註釋演爲歌章令所屬有司各立會所選耆儒碩士充約之正副朔望講舉俾鄉民環而聽之其意良法美深副廟謨非尋常効職可比吾民慮久事湮欲刻石以圖不朽予叨爲約之司正乃謀諸邑侯李公忻然允行即於邑之東郭構亭四楹兩旁八楹前東西復備義倉八楹立石於中以記其事以至小學等堂亦擇地次第舉行使朝廷作德圖化之心憲公體國牖民之念昭乎百世後之爲吾民者本其明倫知有所自慕其德化知有所先無負乎盛世君臣圖治之心則此亭此石於世有補豈曰觀美也哉

又府館於萬歷二十三年奉文拆賣民不敢買崇禎九年知縣李固本又奉旨變賣充餉四鄰俱屬鄉宦王俞譴因議納穀價三十石買去自此郡守行部無駐宿之地亦有傷政體矣籌餉及此國事可知

舊府志
怪異錄

倉儲

義倉 一在西關外書院後道光間知縣王燕堂建一在城內關帝廟西光緒六年知縣何庚生建并奉文勸捐積穀當時實存穀三千八百四十九石九斗二合（西關舊倉儲穀一千九百二十石城內新倉儲穀一千九百二十九石九斗二合）

今俱廢

舊府志

何庚生記略云 蓋聞救荒無善策災祲荐至意賑獨終難爲計惟有圖置於豐積穀備荒爲救民之急務廣平地狹民貧戶鮮蓋藏積穀尤不可緩余於丁丑冬蒞任茲土時逢亢旱鴻嗷遍野詢所設常平倉傾圯殆盡溯查乾隆年間制府方敏恪公所設孟固雙廟寺郎固平固店義倉四處均化爲烏有惟西關有前邑令王公燕堂所建義倉五間完整可用然已久無儲穀粹籌撫恤束手無策余方擬

勸捐義穀有志未逮也已卯冬方伯任筱沅先生旬宣畿輔軫令直隸疊遭水旱
急宜積穀備荒安定章程詳明爵閣督部堂李檄各縣實力勸辦俾我廣平先積
穀二千石再圖擴充迺於三月中督同學官營典邀集城鄉正紳悉心籌劃議定
附城八關廂仍專司修葺舊倉鋪倉廩草器具及晒晾人工無庸捐穀至四鄉紳
民實種地三十畝以上者每畝捐市斗穀一升加耗穀一合按市斗十六斛較制
官斛升各一具用以收穀將來仍用此斛斗於三月廿一日先開西關舊倉收穀
紳民踴躍樂輸甫十日而舊儲滿不得不籌建新倉余迺於城內東街捐買空莊
地二區復邀紳富楊逢春等十九人共湊捐京錢五千七百四十吊揀派生員馮
永清等十人經理出納庀材鳩工建正廩五間以儲穀於廩之西邊建副廩三間
移春秋閣下義學於其中藉資照料並建西廩棚三間門樓二座圍牆一週經始
於四月二十五日落成於五月二十日工堅料實煥然一新爰將已捐未收之穀
收儲新倉稟蒙憲委曲周縣虞公來縣會勘驗迄各在案所有收捐支銷各錢數
及監工紳士姓名俱勒諸碑陰至捐穀數目均經稟明各憲詳載冊檔茲不復贅

常平倉 在縣署儀門內迤西即豫備倉廩九間原儲穀一萬石雍正八年添建廩二

十三間今廢

舊府志

舊義倉 在儒學西明萬歷間知縣王整重修久廢

同上

四鄉義倉 共四處平固村孟固村寺郎固雙廟

幾輔通志

今俱廢

舊府志

壇廟

社稷壇 在北關

舊志

一云在北門外春秋仲月上戊日致祭

風雲雷雨壇 在南門外

舊志參舊府志

每年清明中元下元日並主厲壇與城隍同祭

先農壇 在城東雍正五年建

同上

每歲仲春亥日致祭

厲壇 在城北

同上

城隍廟 在縣治東明隆慶四年邑人張平等修葺清康熙中圯於水知縣華士捷重

建

幾輔通志

乾隆十八年咸豐元年光緒二十三年民國二十二年均重修

明馬明謨記略云 廣平城隍廟其創始莫可考今廟則肇自洪武壬子至成化

辛丑邑令紀公傑方改作之迨去歲庚午幾復百年頗就頽毀邑民張平等願鳩

工力以修迺白邑侯劉公遜公義其舉曰俞遂卜日興工廟寢帷幕肖像咸與維新煥如儼如可以妥神可以崇祀可以聳人之觀瞻而肅人之心志也越三月工用告畢余與淵泉業已遵制褰書匾矣今歲六月邑庠劉子復申其事請予爲記余因書其原委以應之時隆慶六年春月望日也

關帝廟 在縣治東明宏治六年重修萬歷間補修後有春秋樓談經別館崇禎間知

縣朱鼎鑑增修

幾輔通志
參舊府志

清康熙二十二年重修有王俞巽碑記樓後又有啓聖

祠乾隆四十一年知縣張漢松建道光八年知縣王燕堂重修十八年商人等續

修

舊府志

又西關關帝閣明萬歷三十九年修建乾隆四十七年咸豐二年重修按

關帝廟於民國三年奉令改爲關岳廟並祀岳鄂王少保二十八年八月奉治安部咨行河北省令改建武廟中奉周太師尙父兩配兩廡祀歷代名將八十八人門曰武德殿曰武成春秋仲月上戊祭同孔廟是年九月縣知事韓作舟捐俸募款呈明省署重建按正殿即春秋樓

明馬子聰記略云

漢壽亭侯廟在廣平縣治東衢巷北耆宿相傳自國初已有之石泯沒莫究所創之顛暨今歷年茲久日就傾敝邑人崔順廬其側日夕瞻顧久動於衷毅然欲撤而更新乃謀於義官梁賢李凱等白有司俞允諏日興工羣情胥願有積者輸財無積者効力凡百工匠各呈其技而殫其巧踰年故者新毀者完棟宇翬飛像貌烜赫闐闐嗟訝實聳觀瞻蓋經始於宏治癸丑而落成於甲戌也廟既成持幣於子聰記之俾鑱諸石噫子聰亦邑人也少嘗憇息祠下仰其神之靈而愍其廟之古蓋有年矣顧茲義舉是亦情素安敢以固陋辭

張學顏記略云

國初有關王廟三楹中塑神像創建之由無碑可考歲久傾圯屢加修葺規制僅存嘉靖戊子鄉進士賈淵泉加彩而題額焉禳久復爲風雨剝落會鄉民賈遷感夢王靈異楊應魁等議新其制與士人劉形輩詣邑侯宋公昂狀其事公欣然許可而直書王爲漢朝忠義將萬代正直神建修廟祀孰曰不宜遂爲士民倡各輸木料磚瓦自運祠下經始於萬歷戊寅告成於是歲六月增置拜厦三楹與廟制